

2 Mi por lesa

Bishita di dòkter

'Yuda mi! Ken por yuda mi?'
Reno ta wak rònt, pero e no ta mira ta di unda e gritu ta bini.
'Dushi, bin yuda Machi Nela. Bin!'
Reno ta habri porta di kurá di bisiña. E ta mira Machi Nela abou den yerba. Ta kiko a pas' é?
Machi Nela su kara ta sodá.
Ku un man e ta frega su rudia robes. E rudia ta tur hinchá.

'M'a trompeká riba slan di awa,' Machi Nela ta konta Reno.
'Awor mi no por lanta mas. Mi yu, bo por bai kue mi tas pretu den kamber? Den dje tin un karchi ku number di telefòn di ofisina di dòkter.'

'Mesora,' Reno ta kontestá.
'Mi mes ta yama dòkter pa Machi.'
Djis despues dòkter di kas ta kore yega. E ke pone Machi Nela riba su kama pa e saminá e rudia.
Pero Machi ta un poko pisá.
'Mi mester di un hende ku brasa duru pa yuda lanta Machi Nela for di suela,' dòkter ta bisa.

'Mi ta bai yama bisiña, Linu bòksdó,' Reno ta bisa. 'E por hisa Machi sigur.'

Djis despues porta di kurá ta bolbe habri. Linu bòksdó ta kana yega bon purá.
E ta hisa Machi Nela manera ta un pluma e ta.
Ku kuidou e ta pon' é riba su kama. Machi Nela ta hala un rosea grandi.

'Dòkter, Machi Nela tin ku bai hospital?' Reno ta puntra preokupá.
'Nò, mi yu,' dòkter ta respondé.
'Aki un par di dia Machi Nela lo ta bon bon atrobe.
Ta remedi pa doló so e mester bebe tres biaha pa dia.
Bo por bai botika p'e?'



3 Bo a komprendé?

- Promé bo yùfrou òf mener ta lesa e kuenta.
- Despues abo ta les' é.
- Bo a komprendé e kuenta?

Pregunta

1. Dikon Reno no ta mira Machi Nela?
2. Unda Machi Nela a kai?
3. Na kua rudia Machi Nela tin doló?
4. Kon e rudia ta awor?
5. Dikon Machi Nela a kai?
6. Kiko tin den Machi Nela su tas?
7. Dikon dòkter no por hisa Machi Nela?
8. Ken sí por hisa Machi Nela for di suela?
9. Unda Linu ta pone Machi Nela?
10. Dikon Machi Nela ta hala un rosea grandi?
11. Kuantu biaha pa dia Machi Nela mester bebe su remedi pa doló?

